



Broj: 07-37-sl./13  
Ilijaš, 05.10.2013.godine

**STRUČNA SLUŽBA OPĆINSKOG VIJEĆA I  
OPĆINSKOG NAČELNIKA**

Realizacija zaključka Općinskog vijeća Ilijaš sa 11. sjednice održane 26.09.2013. godine

"Zadužuje se Kolegij Općinskog vijeća Ilijaš, da se u narednom periodu, u saradnji sa općinskim načelnikom i nadležnim službama, krene u pripremu tematske sjednice i prikupljanja materijala za istu, a vezano za problematiku zdravstva na području općine Ilijaš"

**INFORMACIJA O AKTUELNOM STANJU U OBLASTI ZDRAVSTVA  
NA PODRUČJU OPĆINE ILIJAŠ**

Ilijaš, novembar 2013.godine

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-690, fax. 400-505,  
Transakcijski račun kod VAKUFSKE BANKE,d.d. Sarajevo:160200000710645  
e-mail [o\\_ilijas@bih.net.ba](mailto:o_ilijas@bih.net.ba)



Zdravstvo , kao veoma važan i složen segment u drušvu, na prostoru općine Ilijaš je prisutno u domenu primarne zdravstvene zaštite , koja je organizovana u skladu sa Zakonom o zdravstvenoj zaštiti i obavlja se kroz usluge:

**JU " Zavod za zdravstvenu zaštitu žena i materinstva Kantona Sarajevo"**

**-lokalitet Ilijaš**

**-lokalitet Srednje**

**JU " Zavod za hitnu medicinsku pomoć Kantona Sarajevo"**

**- punkt Ilijaš**

**JU " Apoteke Sarajevo" - apoteka Ilijaš i Srednje,**

**JU " Dom zdravlja Kantona Sarajevo"**

**DZ Ilijaš sa ambulantom u Srednjem, Kamenici, Gajevima, Podlugovima i Mrakovu (od 10.10.2013.godine).**

**JU " Zavod za zdravstvenu zaštitu žena i materinstva Kantona Sarajevo" - lokalitet Ilijaš**

Zavod za zaštitu žena i materinstva, svoje usluge realizuje putem ambulante u Ilijašu koja je smještena u sklopu objekta Doma Zdravlja Ilijaš, Bogumilska br.6 i ambulante u Srednjem.

I u ovoj godini usluge su vršene u adaptiranom prostoru, koji je omogućio kvalitetne uslove za pružanje usluga i boravak pacijenata u ambulanti. Urađen je alarmni i protivpožarni sistem.

Lokalitet Ilijaš raspolaže sa sljedećom opremom:

- ultrazvučni aparat "Aloca 1700" sa dvije sonde,
- kolposkop,
- dva ginekološka stola,
- Sterilizator,
- Mikroskop,
- CTG aparat i
- sva druga oprema koja je propisana standardima i normativima za obavljanje ginekološke zdravstvene zaštite.

Ambulanta Srednje raspolaže sa sljedećom opremom:

- ultrazvučni aparat "Aloca 500",
- ginekološki sto,
- mikroskop,
- sterilizator i
- sva druga oprema koja je propisana standardima i normativima za obavljanje ginekološke zdravstvene zaštite.

Na lokalitetu Ilijaš zaposlen je jedan ljekar specijalista ginekologije i akušerstva, dvije medicinske sestre-akušerski smjer i jedna spremačica.

Organizovana je monovalentna patronažna služba koja radi u sklopu ginekološke ambulante. Što se tiče kadra zaposlenog na ovom lokalitetu, u ovoj godini nije planirano zapošljavanje novih uposlenika.

Problemi vezani za rad ambulante u Srednjem se nalaze prije svega u nepriznavanju ambulante Srednje od strane Zavoda zdravstvenog osiguranja Kantona Sarajevo i malog broja pacijenata od 5 do 10 mjesečno, te dolazi do povremenih zastoja u radu u ambulanti u Srednjem.

Izveštaj o radu JU Zavod za zdravstvenu zaštitu žena i materinstva – Lokalitet Ilijaš i Srednje za period 01.01.2013. – 30.09.2013.godine dat je tabelarno kako slijedi:

## **JU " Zavod za hitnu medicinsku pomoć Kantona Sarajevo" - punkt Ilijaš**

Zavod za hitnu medicinsku pomoć Kantona Sarajevo, putem svog punkta u Ilijašu pruža primarnu zdravstvenu zaštitu u noćnim satima u periodu od 20,00 do 08,00 sati. U navedenom periodu dežura medicinski tim sa opremljenim ambulantnim vozilom tipa kardiomobil-reanimobil. Ambulanta je opremljena suvremenom medicinskom opremom koja je neophodna za kvalitetnu i brzu dijagnostiku i pružanje adekvatne hitne medicinske pomoći kao i brz medicinski tretiran transport oboljelog ili unesrećenog do najbližeg kliničko-bolničkog centra.

U periodu 01.01.2013. do 30.09.2013.godine urađeno je 3.887 intervencija, u sklopu kojih je izvršeno 4.473 usluge (pod uslugom se podrazumijeva davanje redovne terapije, obrade povreda, previjanja rana, snimanje EKG-a, aplikacije kisika, davanje infuzije, plasiranje urinarnog katetera, utvrđivanje smrti sa izdavanjem prateće dokumentacije, suradnja sa MUP-om tj. utvrđivanje stepena alkoholisanosti vozača, uzimanje krvi na analizu i sl.). U istom periodu je obavljeno i 322 kućne posjete ljekara sa timom i 69 kućnih posjeta medicinskih tehničara u cilju davanja redovne kućne terapije. U istom periodu je izvršeno i 543 medicinskih transporta, naglo oboljelih i povrijeđenih pacijenata do najbližeg kliničko-bolničkog centra.

Što se tiče etio-patologije, uglavnom se radi o srčanim bolesnicima, bolesnicima sa povišenim krvnim pritiskom i poremećajima srčanog ritma, te izvjesnim oboljenjima respiratornih organa kao i simptomatskim oboljenjima respiratornih organa kao i simptomatskim oboljenjima periodično-epidemiološko klimatološkog tipa (gripozna stanja, virusne infekcije i sl.). Pored gore navedenog, medicinsko terenske ekipe su intervenisale i kod saobraćajnih udesa i drugih vrsta povređivanja na području općine Ilijaš.

U periodu od 08,00 sati ujutro do 20,00 uveče, nije organizovano dežurstvo tima hitne medicinske pomoći.

Sva nastojanja zakonodavne i izvršne vlasti općine Ilijaš da se uvede 24-satno dežurstvo hitne medicinske pomoći na punktu Ilijaš do sada nisu dala rezultate. Razlozi za potrebom pružanja ove vrste usluge su višestruki:

Teritorijom općine Ilijaš prolazi 11km autoputa Sarajevo-Zenica; 33km magistralnog puta Sarajevo-Tuzla; 10km regionalnog puta Sarajevo-Visoko; 69km lokalnih puteva i 13km željezničkog koridora Sarajevo-Doboj. Prema podacima Federalnog zavoda za programiranje razvoja, za 2012.godinu, to zbirno čini najveću dužinu magistralnog i regionalnog puta, u odnosu na druge općine Kantona Sarajevo, što je dovoljan pokazatelj disperzije prometnih komunikacija na teritoriji općine Ilijaš. Opterećenost ovih saobraćajnica i gustina saobraćaja dovodi do toga da se svakodnevno na ovim putnim komunikacijama dešavaju saobraćajne nesreće sa tragičnim posljedicama. Samo na željezničkom koridoru desilo se više nesreća u kojima je preko 20 lica izgubilo život, uključujući i nesreću u kojoj su stradala tri dječaka od 14, 15 i 16 godina.

Jedan od trenutno najaktuelnijih problema je problem odvijanja saobraćaja preko pružnih prijelaza. Od ukupno 12 pružnih prijelaza na području općine Ilijaš, 7 pružnih prijelaza je bez signalizacije.

Posebno pitanje je sigurnost djece prilikom prelaska pružnih prijelaza u blizini škole.

Općina Ilijaš je od sjedišta Zavoda za hitnu medicinsku pomoć Kantona Sarajevo udaljena oko 25 km. Ekipama Zavoda za dolazak na intervenciju treba i više od 45 minuta, a brzina djelovanja često zna biti odlučujuća u spašavanju ljudskih života.

Na intervencije u toku dana izlaze ekipe Doma zdravlja Ilijaš koje nisu adekvatno opremljene za hitne intervencije i u svom sastavu nemaju specijaliste urgentne medicine.

Općinsko vijeće Ilijaš je prethodnih godina, u više navrata, istu inicijativu već upućivalo na adrese Skupštine Kantona Sarajevo (kao osnivača Zavoda za hitnu medicinsku pomoć), Vlade Kantona Sarajevo, Ministarstva zdravstva Kantona Sarajevo i Zavoda za hitnu medicinsku pomoć. Navedena inicijativa do sada nije dobila potrebnu podršku uz obrazloženje da na području općine Ilijaš prema zvaničnim podacima statističkih zavoda živi 17.000 stanovnika, a da prema standardima 24-satno dežurstvo se organizuje u općinama koje imaju preko 20.000 stanovnika.

Broj stanovnika općine Ilijaš prema preliminarnim rezultatima nedavno završenog popisa stanovništva iznosi 20.500 stanovnika što znači da u potpunosti zadovoljavamo kriterije - standarde za uvođenje navedenog dežurstva. Navodimo i ukupnu površinu teritorija općine Ilijaš od 324km<sup>2</sup>, kao i veliku udaljenost naseljenih mjesta (preko 40 km) od središta općine.

Sve ovo upućuje na urgentnost uvođenja 24-satnog dežurstva hitne medicinske pomoći na punktu Ilijaš.

U ponuđenom odgovoru Ministarstva zdravstva Kantona Sarajevo na posljednju vijećničku inicijativu od 18.09.2013.godine navodi se mišljenje: *"da treba sačekati usvajanje provedbenih propisa o uslovima, organizaciji i načinu rada hitne medicinske pomoći od strane federalnog ministarstva, kao i kantonalnog propisa o početku, završetku i rasporedu radnog vremena koje ovo ministarstvo planira donijeti u što skorije vrijeme."*

### **JU " Apoteke Sarajevo" - apoteka Ilijaš i Srednje**

Na području općine Ilijaš, JU «Apoteke Sarajevo» opslužuje građanstvo općine Ilijaš putem centralne apoteke koja se nalazi u Ilijašu, ul. Hašima Spahića br.23 i ogranka «Srednje» u Srednjem.

Rad centralne apoteke u Ilijašu organizovan je u tri smjene – permanentna (dežurna) služba. Pacijente opslužuje dvanaest uposlenika, od čega šest magistra farmacije, pet farmaceutske tehničara i jedna spremačica.

U ogranku «Srednje», rad je organizovan u jednoj smjeni i to radnim danom od 07,30 do 15,00 sati, a svaka druga subota u mjesecu je radna. Pacijente opslužuje jedan magistar farmacije.

Što se tiče uvjeta u pogledu opreme, opremljene su najsavremenijom opremom i stručnom literaturom.

Broj realizovanih recepata u Apoteci Ilijaš od 01.01.2013.godine do 30.09.2013.godine bio je 38905

Broj realizovanih recepata u Apoteci Srednje od 01.01.2013.godine do 30.09.2013.godine bio je 13802

Pored usluga nabavke i izdavanja lijekova i drugih medikamenata, pacijenti mogu dobiti stručne savjete i upute. Dobra saradnja je organizovana sa veletrgovnicama na području Kantona Sarajevo, tako da se u slučaju trenutne nestašice i potrebe određenog lijeka, može obezbijediti nabavka istog u vrlo kratkom vremenskom periodu. Također, zbog velikog broja dijabetičara, organizovana je i brza provjera šećera u krvi bez čekanja kao i kontrola pritiska pacijenata.

Na području općine Ilijaš egzistiraju i tri privatne apoteke na dva lokaliteta, jedna u Ilijašu i dvije u Podlugovima.

Apoteke koje egzistiraju na području općine Ilijaš uvrštene su u mrežu ugovornih apoteka na Kantonu Sarajevo i u njima se mogu realizirati recepti na teret sredstava obaveznog zdravstvenog osiguranja Kantona Sarajevo, što znači da se u svim apotekama mogu dobiti lijekovi sa esencijalne liste na recept.

Dobra saradnja sa Domom zdravlja u Ilijašu omogućava da pacijenti veoma brzo dolaze do traženih medikamenata.

Bilo bi neophodno u narednom periodu otvoriti apoteku u Mrakovu u blizini novo otvorene ambulante, čime bi stimulisali bržu registraciju pacijenata za pružanje zdravstvenih usluga u ovoj ambulanti.

### **JU " Dom zdravlja Sarajevo"- DZ Ilijaš sa ambulantom u Srednjem, Kamenici, Gajevima, Podlugovima i Mrakovu (od 10.10.2013.godine)**

U cilju podizanja kvaliteta pružanja zdravstvenih usluga, u periodu 01.01.2013.godine do 30.09.2013.godine, u Domu zdravlja u Ilijašu angažovano je bilo jedanaest timova porodične medicine na pet lokaliteta, uveden je drugi radni dan u ambulanti Kamenica, te obnovljen rad u ambulanti Gajevi po završenoj rekonstrukciji. Također, pokrenut je postupak javne nabavke RTG aparata, a sve u cilju stavljanja u funkciju RTG kabineta. Putem federalnog Ministarstva zdravstva obezbijeđena je oprema za ambulantu u Mrakovu, a JU "Dom zdravlja Kantona Sarajevo" je obezbijedila kadar za početak rada ambulante.

Po standardima i normativima potreban broj timova je 15 na postojeći broj stanovnika i teritorijalnu rasprostranjenost općine i drugih specifičnosti. Obzirom da se trenutno pružaju usluge sa 11 ljekara neophodno je primanje novih ljeekarskih timova kako bi se omogućila adekvatna zdravstvena zaštita na području općine Ilijaš.

Višegodišnji naponi da se u ambulanti pedijatrije obezbijede dva tima za rad u dvije smjene konačno su realizovani u 2012.godine, ali je u martu 2013.godine sa odlaskom jednog pedijatra u Klinički centar ponovo ostao samo jedan tim.

Zajedničkim ulaganjima nadležnog ministarstva i općine Ilijaš stvaraju se prostorni kapaciteti u oblasti zdravstva na području općine Ilijaš, a također, ulaganjem u opremu povećavaju se kapaciteti za širi dijapazon pružanja usluga, a sve u cilju stvaranja kvalitetnijih uslova za pružanje zdravstvenih usluga građanstvu općine Ilijaš.

Izveštaj o radu organizacione jedinice Dom zdravlja Ilijaš za 01.01.2013. godine do 30.09.2013.godine dat je u Izveštaju Ustanove kako slijedi.

## **PRIJEDLOG ZAKLJUČAKA:**

1. JU "Dom zdravlja Kantona Sarajevo" u saradnji sa Zavodom zdravstvenog osiguranje i nadležnim Ministarstvom opremi i stavi u funkciju RTG kabinet do kraja 2013. godine.
2. JU "Dom zdravlja Kantona Sarajevo" u saradnji sa Ministarstvom zdravstva Kantona Sarajevo i općinom Ilijaš izvrši nadziđivanje zgrade Doma zdravlja u Ilijašu, kako bi se stvorili uslovi za otvaranje Centra za fizikalnu terapiju, Centra za mentalno zdravlje i odjeljenja dijabetološkog savjetovašta.
3. U saradnji sa Zavodom za hitnu medicinsku pomoć, JU "Dom zdravlja Kantona Sarajevo", Ministarstvom zdravstva, Skupštinom Kantona Sarajevo stvoriti pretpostavke za realizaciju 24-satnog dežurstva na punktu Ilijaš.
4. U Domu zdravlja Ilijaš do kraja 2013.godine u ambulanti pedijatrije obezbjediti dva tima za rad u dvije smjene.

**Nosilac stručne obrade:** Služba za društvene djelatnosti

**Predlagač:** Općinski načelnik

**Rok:** Novembar 2013.godine